

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 33/03, 42/03, 81/06, 76/07, 81/07 i 94/07), a u vezi sa čl. 1, 21, 22. i 23. Zakona o izmirenju obaveza po osnovu računa stare devizne štednje ("Službeni glasnik BiH", broj 28/06, 76/06 i 72/07), te čl. 13. i 17. Zakona o zaduživanju, dugu i garancijama Bosne i Hercegovine ("Službeni glasnik BiH", broj 52/05), Vijeće ministara Bosne i Hercegovine na 42. sjednici, održanoj 13. marta 2008. godine, donijelo je

ODLUKU

O POSTUPKU IZDAVANJA I NAČINU POSTUPANJA S OBVEZNICAMA BOSNE I HERCEGOVINE KOJE SE IZDAJU RADI IZMIRENJA OBAVEZA PO OSNOVU RAČUNA STARE DEVIZNE ŠTEDNJE

Član 1.

(Opće odredbe)

(1) Ovom Odlukom uređuje se postupak izdavanja i način postupanja s obveznicama Bosne i Hercegovine, koje, na osnovu Zakona o izmirenju obaveza po osnovu računa stare devizne štednje ("Službeni glasnik BiH", broj 28/06, 76/06 i 72/07), (u daljnjem tekstu: Zakon), emitira Bosna i Hercegovina u ime Federacije Bosne i Hercegovine i Republike Srpske (u daljnjem tekstu: entiteti) i Brčko Distrikta Bosne i Hercegovine (u daljnjem tekstu: Distrikt), radi izmirenja obaveza po osnovu računa stare devizne štednje,

(2) Bosna i Hercegovina je odgovorna i garantira za izmirenje obaveza po osnovu računa stare devizne štednje u skladu sa Zakonom, Zakonom o zaduživanju, dugu i garancijama Bosne i Hercegovine i drugim propisima Bosne i Hercegovine.

Član 2.

(Definicije)

(1) Obveznice Bosne i Hercegovine u smislu ove Odluke su vrijednosni papiri Bosne i Hercegovine (u daljnjem tekstu: obveznice) koje na osnovu Zakona emitira Bosna i Hercegovina u ime entiteta i Distrikta radi izmirenja obaveza po osnovu računa stare devizne štednje.

(2) Ostali termini koji se koriste u ovoj Odluci imaju isto značenje utvrđeno Zakonom, Zakonom o zaduživanju, dugu i garancijama Bosne i Hercegovine i Sporazumom o obavljanju poslova fiskalnog agenta za vrijednosne papire Bosne i Hercegovine (u daljnjem tekstu: Sporazum).

Član 3.

(Emisija obveznica)

(1) Obveznice se emitiraju u vrijednosti koja odgovara ukupnom zbiru obaveza entiteta i Distrikta po osnovu računa stare devizne štednje (u daljnjem tekstu: štedni ulogi), utvrđenih aktom entiteta i Distrikta, kojim se potvrđuje iznos obaveze, a na osnovu lokacije obaveza u skladu sa Zakonom.

(2) Iznos sredstava iz stava (1) ovog člana čini ukupan iznos štednih uloga verifikovan u skladu sa Zakonom i umanjen za izvršene gotovinske isplate.

Član 4.

(Oblik obveznice)

- (1) Obveznice se emitiraju u elektronskom - nematerijaliziranom obliku i izražene su u novčanoj jedinici koja je zakonsko sredstvo plaćanja u Bosni i Hercegovini.
- (2) Obveznice glase na ime i potpuno su prenosive.

Član 5.

(Provedbeni propisi)

- (1) Ministarstvo finansija i trezora Bosne i Hercegovine (u daljnjem tekstu: Ministarstvo) će prije roka utvrđenog za emisiju obveznica donijeti Odluku o emisiji obveznica i Prospekt o emisiji obveznica, kao i akt kojim će urediti način i postupak konverzije štednih uloga u obveznice.
- (2) Konverziji štednih uloga u obveznice prethodi dostava podataka Ministarstvu o štednim ulozima od strane entiteta i Distrikta, te akata entiteta i Distrikta iz člana 3. ove Odluke.

Član 6.

(Raspored dospijeca obveznica po godinama)

- (1) Na prijedlog Ministarstva, a u skladu sa članom 21. Zakona, Vijeće ministara Bosne i Hercegovine (u daljnjem tekstu: Vijeće ministara) će prije roka utvrđenog za emisiju obveznica donijeti Odluku kojom će se utvrditi raspored dospijeca obveznica po godinama.
- (2) Odluka iz stava (1) ovog člana će sadržavati i:
 - a) ukupan nominalni iznos obveznica;
 - b) nominalni iznos obveznica po godinama sa datumima dospijeca;
 - c) iznos kamate (kupon) sa datumima dospijeca.

Član 7.

(Fiskalni agent)

- (1) Centralna banka Bosne i Hercegovine (u daljnjem tekstu: Centralna banka) je odgovorna za obavljanje funkcije fiskalnog agenta u skladu sa Zakonom o zaduživanju, dugu i garancijama Bosne i Hercegovine i Sporazumom.
- (2) Uz odobrenje Ministarstva, Centralna banka će ovlastiti postojeće entitetske registre vrijednosnih papira (u daljnjem tekstu: registri) da djeluju kao njeni agenti, što će se regulirati posebnim agentskim sporazumima.

Član 8.

(Registracija obveznica)

- (1) Shodno stavu (2) člana 7. ove Odluke, registracija obveznica će se vršiti kod registara.

(2) Registri će otvoriti i voditi račune vlasnika obveznica, izvršiti registraciju i čuvati podatke o sticanju vlasništva i pravima na obveznicama, izdavati izvještaje, izvode i potvrde o stanju i promjenama na računima vlasnika obveznica u skladu sa entitetskim propisima koji uređuju tržište vrijednosnih papira.

Član 9.

(Dostava podataka Centralnoj banci)

(1) Nakon izvršene konverzije, Ministarstvo će dostaviti Centralnoj banci podatke o konvertovanim iznosima u obveznice, zajedno sa certifikatom o ukupnom zaduženju sa pregledom duga po entitetima i Distriktu.

(2) Dokumente iz stava (1) ovog člana Centralna banka dostavlja nadležnim registrima prema mjestu izvršene verifikacije štednih uloga.

Član 10.

(Otvaranje vlasničkih računa)

(1) Na osnovu dokumenata iz člana 9. i propisa iz člana 5. ove Odluke, a po nalogu Centralne banke, registri će izvršiti otvaranje vlasničkih računa i registraciju obveznica.

(2) Pravo vlasništva i raspolaganja nad obveznicama se stiče danom registracije obveznica u registrima.

(3) O izvršenoj registraciji emisije i obveznica, Centralna banka će odmah obavijestiti Ministarstvo.

Član 11.

(Izdavanje potvrde)

Po izvršenoj registraciji obveznica, Centralna banka će u skladu sa članom 22. Zakona izdati Potvrdu u papirnoj formi.

Član 12.

(Trgovanje obveznicama)

(1) Trgovanje (promet) obveznicama vršit će se na berzama i drugim uređenim javnim tržištima koja se osnivaju radi stvaranja uvjeta za povezivanje ponude i tražnje vrijednosnih papira.

(2) Promet obveznicama se može vršiti na cijeloj teritoriji Bosne i Hercegovine.

Član 13.

(Prijevremeni otkup)

(1) Na zahtjev entiteta i Distrikta, Vijeće ministara može donijeti odluku o prijevremenom otkupu obveznica.

(2) Ni vlasnik obveznice, niti bilo koje drugo pravno ili fizičko lice, ne može obveznice proglasiti plativim prije roka njihovog dospjeća odnosno ne može tražiti njihov prijevremeni otkup, osim u slučaju iz stava (1) ovog člana.

Član 14.

(Poništavanje obveznica)

Način poništavanja obveznica nakon izvršenog plaćanja po dospijeću ili prijevremenog otkupa uredit će se agentskim sporazumom između Centralne banke i registara.

Član 15.

(Sporna potraživanja)

Sporna potraživanja, verificirana nakon donošenja akata entiteta i Distrikta iz člana 3. ove Odluke, izmiriti će se po Zakonom propisanom postupku.

Član 16.

(Troškovi)

Troškove registara po osnovu otvaranja računa vlasnika obveznica, registracije emisije i izdavanja vlasniku obveznice prvog izvoda o vlasništvu nad obveznicama iz člana 3. ove Odluke snosi Centralna banka.

Član 17.

(Stupanje na snagu i objavljivanje)

Ova Odluka stupa na snagu narednog dana od dana objavljivanja u "Službenom glasniku BiH".

Član 18.

(Izuzetak od primjene)

Ova Odluka neće se primjenjivati na entitet Republiku Srpsku do konačne odluke Ustavnog suda Bosne i Hercegovine za ocjenu ustavnosti Zakona o uvjetima i načinu izmirenja obaveza po osnovu računa stare devizne štednje emisijom obveznica u Republici Srpskoj ("Službeni glasnik Republike Srpske", broj 1/08).

VM broj 32/08
13. marta 2008. godine
Sarajevo

Predsjedavajući
Vijeća ministara BiH
dr. **Nikola Špirić**, s. r.

